



Communicaziun a las medias

Top Pop Rumantsch lantscha la segunda seria

Cuira, 28-03-08: Suenter l'ediziun da sia emprima rimnada sin DC cuntinuescha la retscha Top Pop Rumantsch cun la proxima seria. Curdin Nicolay chanta «Nüglia da nouv». Exclusiv sin Radio Rumantsch.

Sin la cumpilaziun alternativa rumantscha «accent», cumparida la primavaira 2007, figurescha el tranter las trovaglias – il chantatur ladin Curdin Nicolay, cun sia ballada dal «Kindl», ina chanzun d'in discurs laconic en il tren. En ina sumeglianta tunalitat turna il giuven musicist da Bever cun sia contribuziun al nov Top Pop Rumantsch: «E schi nu naiva, lura plouva, e schi plouva fissa meglder schi navess». Cun ina poesia schlantga ed associativa descriva la chanzun in lieu nua che pauc capita, danor ils baggers che lavuran or sin ils prads. «Nüglia da nouv» di il titel apunta. Il producent Manfred Zazzi ha contribuì al toc la tempru ritmica dals trubadurs dad ozendi. Il groove suttastritga la frasa clav da la chanzun: «Vairamaing saja bain che chi'm manca». Tge, gliez è surlaschè a la fantasia da l'auditor – sco adina en las meglras chanzuns.

Nüglia da nouv

E schi nu naiva, schi lura plouva
e schi plouva, füssa meglder schi navess
vairamaing saja bain che chi'm manca

Uoss' eschan qua fingià üna ter pezza
i nun es nüglia da nouv, minchün chi'ns cugnüoscha
coura sül prà lavuran ils baggers
chi sa schi fan il paradis

Eu sun Engiadinais e tü m'hast dit ch'eu guarda tais
meis bazegner d'eir'ün paur, incas
meis bap es sülla glüna e ma mamm'es sü Muntatsch
d'ingionder voust ch'eu sa quai

E schi nu naiva, schi lura plouva
e schi plouva, füssa meglider schi navess
vairamaing esa cler che chi manca

No eschan qua e guardain our da fanestra
tù guardast a dretta ed eu guard a schnestra
coura sül prà chavan ils baggers
sco sch'ün da no stess ir

Eu sun Engiadinais e tü m'hast dit ch'eu guarda tais
meis bazegner d'eir'ün paur, incas
meis bap es sülla glüna e ma mamm'es sü Muntatsch
d'ingionder voust ch'eu sa quai

Interpret, musica & text: Curdin Nicolay
Producziun: Manfred Zazzi
Batteria: Muso Stamm
Bass: Danny Hertach
Ghitaras: Jean-Pierre Von Dach

Curdin Nicolay, naschì l'onn 1981 e creschì a Bever, pendulescha oz tranter Lucerna e Berna. Sias influenzas musicalas partan da las chanzuns da Paulin Nuotclà – ses barba – e tanschan fin tar la ramur dals Nirvana. Ina pezza ha'l sunà ghitarra en ina band engiadinaisa, oz preferescha'l scriver sias atgnas chanzuns en moda da «zambregiader» solitari – cun pauca prescha per il palc.

Top Pop Rumantsch è in label per purschidas innovativas ed unicas en il program da musica da RR. Las emprimas dudesch chanzuns da la retscha èn cumparidas sin il disc cumpact «Top Pop Rumantsch, Vol. I, 2005-2007», da retrair tar: Radio Rumantsch, Via Masans 2, 7002 Cuira, u: www.rtr.ch.

Per ulteriuras infurmaziuns:

Jachen Prevost, manader redacziun da musica RR, tel. 081 255 75 75, jachen.prevost@rtr.ch